

Na osnovu člana 12.stav 2. Zakona o zaštiti zraka ("Službene novine Federacije BiH", broj: 33/03) Federalni ministar prostornog uređenja i okoliša donosi:

PRAVILNIK

O MONITORINGU KVALITETA ZRAKA

Član 1.

Ovim pravilnikom uređuje se uspostava i izvođenje monitoringa zraka s ciljem:

- 1) dobivanja indikatora kvaliteta zraka s obzirom na njegovo djelovanje na ljude, eko-sisteme i njihove dijelove, kao i izgrađena dobra, u cilju ocjene stanja i ocjene efekata mjera za ograničavanje ili sanaciju zagađivanja vazduha ,
- 2) dobivanja podataka u cilju udovoljavanja međunarodnim ugovorima kojima je Bosna i Hercegovina pristupila, a gdje se zahtjeva razmjena podataka o kvalitetu zraka i posrednih pokazatelja koji su u vezi s njim, kao i prekograničnom prenosu zagađujućih materija
- 3) utvrđivanja zadataka ovlaštene institucije za vođenje sistema monitoringa.

Član 2.

Ovlaštena institucija iz člana 1.ovog pravilnika je Federalni meteorološki zavod.

Poslovi i zadaci Federalnog meteorološkog zavoda su:

- 1) uspostava, organiziranje i upravljanje sistemom monitoringa kvaliteta zraka u Federaciji Bosne i Hercegovine, kao dijela monitoringa u Bosni i Hercegovini;
- 2) uspostava informacionog sistema kvaliteta zraka u cilju izvještavanja o rezultatima monitoringa u propisanim formatima.

Član 3.

U smislu ovoga pravilnika sljedeći izrazi imaju značenje:

- 1) «*mjerenje*» je skup postupaka kojima se određuje vrijednost pokazatelja kvaliteta vazduha i/ili posrednih pokazatelja kvaliteta vazduha;
- 2) «*pokazatelj kvaliteta zraka* » je mjerljiva veličina nekog kemijskog elementa i/ili spoja, odnosno fizikalnog stanja i/ili pojave, koji uzrokuje promjenu kvaliteta zraka;
- 3) «*posredni pokazatelj kvaliteta zraka*» je mjerljiva veličina kojom se opaža promjena na biljkama, građevinama i u biološkim nalazima i koja ukazuje na učinak zagađenog zraka;
- 4) «*gustoća mjerenja*» je broj mjernih rezultata pojedinog pokazatelja kvaliteta zraka i/ili posrednog pokazatelja kvaliteta zraka u jedinici vremena;

Član 4.

Mreža monitoringa kvaliteta zraka može biti:

- 1) federalna-entitetska (kao dio države),
- 2) kantonalna,
- 3) gradska / općinska
- 4) operatora pogona i postrojenja (izvora zagađivanja) i
- 5) posebnih područja.

Monitoring federalnog značaja vodi Federalni meteorološki zavod.

Član 5.

Monitoring kvaliteta zraka Federacije Bosne i Hercegovine ima za cilj:

- 1) određivanje kvaliteta zraka u stanicama pozadinskog zagađivanja, regionalnog i prekograničnog daljinskog prenosa, te praćenja u okviru međunarodnih obaveza države,
- 2) određivanje kvaliteta zraka na područjima nacionalnih parkova, zaštićenih pejzaža, zaštićenih područja, spomenika prirode, osjetljivih okolinskih sistema, te kulturnog i prirodnog nasljeđa,
- 3) određivanje kvaliteta vazduha u naseljima i industrijskim područjima.

Član 6.

Izbor lokacije stanica Federalnog monitoringa i njihovog tipa i broja, te gustina mjerenja, određuju se u Federalnoj strategiji zaštite zraka od zagađivanja.

U mrežu Federalnog monitoringa mogu biti uključene i reprezentativne stanice iz sistema monitoringa nižeg reda iz alineje 2, 3, 4. i 5. člana 4. ovog pravilnika.

Član 7.

Monitoring operatora pogona i postrojenja mogu uspostaviti operatori koji su značajni zagađivači zraka, s ciljem pribavljanja podataka za pravilno vođenje tehnologije i opterećenja ili planiranja investicionih odluka (izbor uređaja za prečišćavanje ispusnih otpadnih gasova, povećanje visine dimnjaka, dislociranje postrojenja).

Član 8.

Federalni meteorološki zavod je dužan da o rezultatima monitoringa izvještava Federalno ministarstvo prostornog uređenja i okoliša, Federalno ministarstvo zdravstva, odnosno u okviru njega Federalni zavod za javno zdravstvo Federacije Bosne i Hercegovine, Federalni zavod za statistiku i javnost u Bosni i Hercegovini, Evropsku agenciju za okoliš/EEA (prema propisanom formatu) i Sekretarijat relevantnih konvencija (prema propisanom formatu) koje je Bosna i Hercegovina ratificirala, potpisala ili kojima je pristupila.

U cilju uporedivosti rezultata mjerenja među pojedinim institucijama u BiH mreži monitoringa, navedenog izvještavanja, odnosno mogućnostima razmjene podataka sa drugim državama, Federalni meteorološki zavod će koristiti standardiziranu i usvojenu međunarodnu metodologiju o osiguranju kvaliteta mjerenja i osigurati njeno stalno provođenje i poboljšavanje u okviru uspostavljene BiH mreže monitoringa kvaliteta vazduha i međunarodnih obaveza.

Sve organizacije koje su uključene u sistem monitoringa federalnog (time i državnog) značaja dužne su osiguravati kvalitet svojih mjerenja, prema formatu i metodologiji iz st. 1 i 2. ovog člana.

Član 9.

Zainteresirana javnost se obavještava o kvalitetu zraka i to:

- 1) po isteku kalendarske godine davanjem statističkih podataka i ocjene o zadovoljavanju / prekoračenju graničnih vrijednosti kvaliteta zraka u prethodnoj godini,
- 2) u realnom vremenu ukoliko koncentracije prekoračuju upozoravajuće i kritične vrijednosti kvaliteta zraka, a stanica po svojim tehničkim karakteristikama omogućava davanje informacije u realnom vremenu.

Član 10.

Finansiranje sistema monitoringa obezbjeđuje:

- 1) Federacija Bosne i Hercegovine za stanice iz mreže federalnog monitoringa, osim reprezentativnih stanica iz monitoringa nižeg reda;
- 2) Kantoni i općine za stanice sistema monitoringa mreže ovlaštenih stanica na nivou kantona i opština,
- 3) Zainteresovani operatori pogona i postrojenja za mrežu stanica iz njihovih sistema.

Član 11.

Ovaj pravilnik stupa na snagu narednog dana od dana objave u «Službenim novinama Federacije BiH».

Broj:-----

Sarajevo,-----

Ministar
Ramiz Mehmedagić, s.r.